



DEPUTACIÓN PROVINCIAL  
A CORUÑA

Servizo de Acción Social, Cultural e Deportes

Referencia: FO203 / 2026

Expediente convocatoria: 2025000033962

**RESOLUCIÓN POLA QUE SE AVOCA A COMPETENCIA PARA A APROBACIÓN DAS BASES REGULADORAS E SE APROBAN AS BASES E A CONVOCATORIA DO PROGRAMA DE SUBVENCÍONS A ENTIDADES SEN FINS DE LUCRO PARA A REALIZACIÓN DE ACTIVIDADES CULTURAIS DURANTE O ANO 2026 (FO203 / 2026)**

Don **VALENTÍN GONZÁLEZ FORMOSO**, Presidente da Deputación Provincial da Coruña,

**ANTECEDENTES**

Por resolución número 29325, de 24 de xullo de 2023, o Presidente delegou na Xunta de Goberno entre outras: "A aprobación das bases de subvencións, cuxa competencia corresponda inicialmente ao presidente".

Tendo en conta a data da convocatoria da próxima Xunta de Goberno e considerando a urxencia de aprobar as Bases reguladoras do "Programa de subvencións a entidades sen fins de lucro para a realización de actividades culturais durante o ano 2026", e vistos os informes do Servizo de Acción Social, Cultural e Deportes, da Secretaría Xeral e do Servizo de Fiscalización e Control Financeiro,

**RESOLVO:**

**Primeiro.** Avocar a competencia que, con carácter xeral foi delegada por resolución número 29325, de 24 de xullo de 2023 na Xunta de Goberno, e considerando a urxencia da aprobación das Bases reguladoras do "Programa de subvencións a entidades sen fins de lucro para a realización de actividades culturais durante o ano 2026", que ven motivada pola necesidade de que as persoas destinatarias poidan facer as súas previsións respecto do obxecto da subvención neste programa para o exercicio 2026 coa suficiente antelación.

**Segundo.** Aprobar as Bases reguladoras do "Programa de subvencións a entidades sen fins de lucro para a realización de actividades culturais durante o ano 2026", que figuran no Anexo - Bases Reguladoras.

**Terceiro.** Dispoñer a publicación das bases deste programa no Boletín Oficial da Provincia da Coruña.

**Cuarto.** Aprobar a convocatoria do Programa de subvencións a entidades sen fins de lucro para a realización de actividades culturais durante o ano 2026, de conformidade coas bases reguladoras que

figuran no Anexo - Bases Reguladoras.

O prazo de solicitude iniciárase ás 08:00 horas do día 15 de novembro de 2025, e finalizará ás 14:00 horas do día 16 de decembro de 2025, tendo en conta que, tanto as solicitudes como o resto da tramitación do programa, realizarase por vía telemática a través da plataforma SUBTEL, accesible dende a sede electrónica da Deputación Provincial da Coruña.

**Quinto.** Remitir esta resolución, así como o extracto da convocatoria conforme ao Anexo - Extracto da convocatoria, á Base de Datos Nacional de Subvencións (BDNS), para a súa publicación a través do Sistema Nacional de Publicidad de Subvenciones y Ayudas Públicas, de conformidade co previsto nos artigos 17.3.b e 20.8.a da Lei 38/2003, de 17 de novembro, xeral de subvencións, publicación que se tramitará como urgente.

**Sexto.** Dar conta desta resolución á Xunta de Goberno.

Contra a presente resolución, que pon fin á vía administrativa, pódese interpor, alternativamente, recurso de reposición potestativo, no prazo dun mes perante o mesmo órgano que ditou o acto, ou recurso contencioso-administrativo, perante o Xulgado do Contencioso Administrativo da Coruña no prazo de dous meses, a partir do día seguinte a aquel no que teña lugar a notificación. Se se optara por interpor o recurso de reposición potestativo non se poderá interpor recurso contencioso administrativo ata que aquel sexa resolto expresamente ou se produza a súa desestimación por silencio.

Todo isto, sen prexuízo de que se poida exercitar calquera outro recurso que se estime pertinente.

## ANEXO - BASES REGULADORAS

### BASES REGULADORAS DO PROGRAMA DE SUBVENCIÓNS A ENTIDADES SEN FINS DE LUCRO PARA REALIZAR ACTIVIDADES CULTURAIS DURANTE O ANO 2026 (FO203/2026)

#### Datos do programa

<b>Unidade xestora</b>	Servizo de Acción Social, Cultural e Deportes
<b>Sección</b>	Sección de Educación e Cultura
<b>Anualidade</b>	2026
<b>Denominación</b>	Programa de subvencións a entidades sen fins de lucro para realizar actividades culturais durante o ano 2026
<b>Beneficiarios</b>	Entidades sen fins de lucro que acrediten que as actividades se realizarán na provincia da Coruña
<b>Programa</b>	FO203/2026
<b>Aplicación orzamentaria</b>	0612/3341/481
<b>Importe da convocatoria</b>	1.200.000 € Este importe poderá ser obxecto de modificación orzamentaria.
<b>Importe do orzamento de gastos</b>	Sen límite
<b>Importe da subvención que se vai conceder</b>	Mínimo 3.000 €  Máximo en función da modalidade: A. Entidades culturais: 30.000 € B. Entidades veciñais e de tempo libre: 10.000 € C. Asociacións de carácter pedagóxico: 10.000 € D. Entidades sociais e asistenciais: 10.000 €
<b>Importe solicitado</b>	Do 20 % ao 80 % do orzamento de gastos subvencionable
<b>Coeficiente de financiamento</b>	Variable entre 20% e 80%
<b>Gasto anticipado</b>	Si, será de aplicación o establecido na Ordenanza xeral de subvencións e transferencias da Deputación da Coruña.

#### Exposición de motivos

A Deputación da Coruña, no marco das súas competencias, destina importantes recursos á actividade de fomento, principalmente mediante a concesión de axudas económicas orientadas á promoción de actividades e investimentos, e mantemento de centros e servizos

considerados de interese público, coa finalidade de contribuír a que as entidades da provincia acaden os obxectivos que lles son propios e de fomentar a participación da cidadanía nos distintos ámbitos de actuación e promover a igualdade de xénero.

## **BASES**

### **Base 1. Réxime xurídico**

O marco normativo polo que se rexerán as subvencións concedidas pola Deputación é o establecido na Ordenanza xeral de subvencións e transferencias da Deputación da Coruña e na seguinte normativa específica:

- Lei 1/2002, do 22 de marzo, reguladora do dereito de asociación.
- Lei 5/2016, do 4 de maio do patrimonio cultural de Galicia.

A presente subvención está incluída no plan estratéxico provincial de subvencións da Deputación 2025-2027 aprobado polo Pleno da Corporación en sesión ordinaria do 27 de setembro do 2024 e contribúe ao logro dos obxectivos incorporados no dito plan, en particular ao Obxectivo Estratéxico 7: "Apoiar, promover e difundir a cultura e a formación no ámbito provincial", e aos seus obxectivos operativos O.36 (ampliar a oferta cultural provincial e garantir o acceso á cultura a toda a poboación), O.38 (promover a actividade cultural en todas as súas manifestacións) e O.39 (promover a lingua e a cultura galegas), mediante o apoio a proxectos e actividades culturais promovidas por entidades sen ánimo de lucro.

### **Base 2. Obxecto e finalidade**

#### **2.1 Obxecto**

Será obxecto deste programa o apoio ao desenvolvemento de proxectos e actividades culturais na provincia da Coruña por parte de entidades sen ánimo de lucro.

##### **2.1.1 Tipo de actividade subvencionable**

Para os efectos desta convocatoria enténdese por actividade subvencionable todas aquelas actividades das diferentes dimensións da cultura (creación, investigación, formación, difusión, programación, etc.) e todos aqueles formatos (edición de contidos físicos e dixitais, actividades e eventos ao vivo, etc.) e ámbitos (patrimonio, historia e memoria local e veciñal, música, artes escénicas e do movemento, audiovisual, literatura, artes visuais, etc.), agás aquelas actividades que aparecen explicitamente como excluídas na Base 5.2 desta convocatoria.

### **2.1.2 Modalidades**

O programa distingue catro modalidades de entidades sen fins de lucro. As entidades solicitantes deberán indicar na súa petición a modalidade da que forman parte. A Sección de Cultura da Deputación procederá, caso de detectar escollos erróneas por parte das entidades, á súa corrección e adscrición á modalidade axeitada.

#### *Modalidade A. Entidades culturais.*

Deberán ter a súa natureza cultural recollida nos estatutos, e diferenciamos dous tipos, en función do territorio en que desenvolven a súa actividade:

A1. Entidades que desenvolven a súa actividade ordinaria na provincia da Coruña.

A2. Entidades que desenvolven a súa actividade ordinaria tanto dentro como fóra da provincia da Coruña.

#### *Modalidade B. Entidades veciñais e de tempo libre.*

Asociacións de veciños e veciñas, xuvenís, de amas de casa, da terceira idade, de mulleres rurais, etc. e tamén asociacións do ámbito do tempo libre.

#### *Modalidade C. Asociacións de carácter pedagógico..*

Esta modalidade procura contribuír ao desenvolvemento de actividades culturais promovidas por asociacións de carácter pedagógico.

#### *Modalidade D. Entidades sociais e asistenciais.*

Inclúense neste apartado as asociacións e entidades que traballan no campo dos dereitos civís, a igualdade, a defensa do medio ambiente, a memoria histórica e democrática, os valores cívicos, o desenvolvemento do territorio, os servizos sociais e outros.

## **2.2 Ámbito temporal**

As actividades obxecto deste programa deben realizarse no período comprendido entre o **1 de xaneiro de 2026 e o 31 de decembro de 2026**. Polo tanto, unicamente admitiranse xustificantes de gastos expedidos dentro das datas sinaladas.

Excepcionalmente, para xustificar os gastos que fosen realizados no final do período da convocatoria poderán admitirse xustificantes que sexan expedidos antes do 16 de xaneiro de 2027.

## **2.3 Finalidade**

A área de Cultura da Deputación da Coruña renova a súa aposta polo apoio ao sector cultural en todas as súas dimensións, e moi especialmente naquelas máis directamente vinculadas á creación de emprego e mantemento de estruturas profesionais e creativas.

### **Lingua galega:**

O Estatuto de Autonomía de Galicia, aprobado en 1981, puxo fin no plano legal á prohibición

e discriminación padecida pola lingua galega durante a Ditadura franquista, dispoñendo no seu artigo 5º que:

1. A lingua propia de Galicia é o galego.
2. Os idiomas galego e castelán son oficiais en Galicia e todos teñen o dereito de os coñecer e de os usar.
3. Os poderes públicos de Galicia garantirán o uso normal e oficial dos dous idiomas e potenciarán o emprego do galego en todos os planos da vida pública, cultural e informativa, e disporán os medios necesarios para facilitar o seu coñecemento.

Pola súa banda, a Lei de normalización lingüística, aprobada en 1983, sinala no seu artigo 4.1 que o galego, como lingua propia de Galicia, é a lingua oficial das institucións da comunidade autónoma, da súa Administración, da Administración local e das entidades públicas dependentes da comunidade autónoma; no seu artigo 6.1, que os cidadáns teñen dereito ao uso do galego, oralmente e por escrito, nas súas relacións coa Administración pública no ámbito territorial da comunidade autónoma; no seu artigo 6.2, que as actuacións administrativas en Galicia serán válidas e producirán os seus efectos calquera que sexa a lingua oficial empregada; no seu artigo 6.3, que os poderes públicos de Galicia promoverán o uso normal da lingua galega, oralmente e por escrito, nas súas relacións cos cidadáns; e no artigo 10 que os topónimos de Galicia terán como única forma oficial a galega e que lle corresponde á Xunta de Galicia a determinación dos nomes oficiais dos topónimos de Galicia.

Finalmente, o artigo 7.1 da Lei 5/1997 da administración local de Galicia especifica que o galego, como lingua propia de Galicia, tamén o é da súa Administración local. Ademais, detalla que as convocatorias de sesións, ordes do día, mocións, votos particulares, propostas de acordo, resolucións nas comisións informativas, actas, notificacións, recursos, escrituras públicas, comparecencias xudiciais e todos os actos de carácter público ou administrativo que se realicen por escrito en nome das corporacións locais se redactarán en lingua galega. Pola súa parte, desde o ano 2017 esta Deputación conta cunha Ordenanza de usos da lingua galega que define o marco lingüístico de funcionamento interno e os criterios que rexen neste aspecto.

A pesar do recollido no devandito marco legal, a evolución do contexto cultural e a carencia de políticas de apoio á lingua galega no plano social e educativo nas últimas décadas fai que, como sinalan todos os datos dos estudos científicos realizados ao respecto, a lingua galega continúe hoxe a vivir unha situación de evidente desigualdade social, e que a produción cultural, científica e comercial realizada en lingua galega atope grandes dificultades para se poder desenvolver en normalidade no noso propio país.

A Área de Cultura da Deputación da Coruña, consciente desta realidade e convocante desta liña de subvencións, considera que as administracións públicas galegas temos a obriga legal e o deber político de garantir que non se produzan discriminacións nin desigualdades, sexan estas da natureza que sexan, e dentro delas tampouco as que se dan nos usos lingüísticos. O ámbito público debe ser exemplar no seu esforzo e compromiso para facer posible en Galicia o que hoxe non o é: vivir con normalidade en galego, en todos os campos da vida social, cultural e económica. Para logralo, son fundamentais as políticas públicas que apoien claramente a diversidade cultural e garantan o dereito á produción e ao acceso cultural no

noso idioma. Non desenvolver políticas de apoio á lingua galega supón contribuír, por abandono de responsabilidade pública, á súa minoración social e á continuidade e agravamento da desigualdade hoxe existente.

### Base 3. Solicitantes

Poderán solicitar subvencións neste programa as seguintes entidades que acrediten que as actividades obxecto da subvención se realizarán no ámbito territorial da provincia da Coruña e que cumpran os requisitos desta convocatoria e os establecidos na Ordenanza xeral de subvencións e transferencias no momento de presentaren a solicitude.

- Modalidade A. Entidades culturais.

A1. Entidades que desenvolven a súa actividade ordinaria na provincia da Coruña A2. Entidades que desenvolven a súa actividade ordinaria tanto dentro como fóra da provincia da Coruña.

- Modalidade B. Entidades veciñais e de tempo libre.
- Modalidade C. Asociacións de carácter pedagóxico.
- Modalidade D. Entidades sociais e asistenciais.

#### Entidades excluídas:

- Fundacións, entidades privadas sen fins de lucro titulares de museos, centros de interpretación ou bibliotecas e entidades con función de representación sectorial e colectiva das persoas e/ou entidades dos ámbitos profesionais e amadores da cultura galega, que contan cunha liña específica para o apoio ás súas actividades: a convocatoria FO215.
- Corais polifónicas, bandas de música populares, entidades de música e baile tradicional galego ou formacións musicais de grande formato da provincia da Coruña, que contan cunha liña específica para o apoio ás súas actividades: a convocatoria FO213.
- Colexios Profesionais.
- ANPAS.

### Base 4. Gastos subvencionables

#### Gastos subvencionables no programa FO203:

CONTA	DESCRICIÓN DA CONTA, SEGUNDO O PXCPENL
-------	--

<b>600</b>	Compras de bens destinados á actividade (material non inventariable)
<b>607</b>	Traballos realizados por outras empresas para o desenvolvemento da actividade
<b>621</b>	Arrendamentos e canons
<b>624</b>	Transportes (só gastos de desprazamentos concertados con terceiros en transporte público ou privado)
<b>627</b>	Publicidade e propaganda
<b>640</b>	Soldos e salarios
<b>641</b>	Indemnizacións
<b>642</b>	Seguridade social a cargo da entidade
<b>647</b>	Anticipos dos socios traballadores de cooperativas

*Consideracións con respecto aos gastos subvencionables:*

- Unicamente serán obxecto de axuda os gastos de carácter corrente, en ningún caso bens inventariables.
- Na conta 607 “Traballos realizados por outras empresas” inclúense:
  - Traballos do proxecto encargados a outras empresas.

No caso de que contrate cun mesmo provedor un gasto superior a 15.000 € (IVE excluído) pola prestación dun servizo, a entidade beneficiaria deberá solicitar como mínimo tres orzamentos de diferentes provedores con carácter previo á contratación.

- Para poder xustificar o gasto de alugueiro do local social da entidade, deberá realizar un mínimo de 20 actividades culturais anuais, excluíndose do cómputo as de natureza interna (reunións da directiva, asembleas, ensaios, etc.). Este gasto non poderá superar o 50% do gasto total xustificado.
- No caso dos soldos e salarios e seguridade social, unicamente se terán en conta os do persoal relacionado coas actividades subvencionadas. Deberá acreditarse esta vinculación na memoria xustificativa.

#### **4.1 Gastos excluídos:**

- Gastos de manutención e aloxamento.
- Gastos de carácter xeral da entidade, incluídos os gastos de mantemento da páxina web e redes sociais da entidade.
- Gastos de atencións protocolarias (medallas, placas, trofeos, figuras etc...)
- Gastos de material inventariable.
- Gastos financeiros e os de xestión.
- Non se subvencionarán os gastos relacionados con material, publicidade e



propaganda de concentracións e mobilizacións sociais ou políticas.

Tampouco se financiarán aqueles gastos relacionados con fundacións e asociacións vinculadas a partidos políticos, agás os que estean dirixidos ao funcionamento das mesmas e a actividades de estudo de desenvolvemento do pensamento político, social e cultural.

## **Base 5. Compatibilidades e exclusións**

### **5.1 Compatibilidades**

As subvencións deste programa son compatibles con outras subvencións, axudas, ingresos ou recursos para a mesma finalidade, procedentes de calquera outra administración ou ente público ou privado, nacional, da Unión Europea ou de organismos internacionais.

As subvencións deste programa son incompatibles con outras subvencións da área de Cultura, excepto cos seguintes programas:

- FO204: Programa de subvencións a entidades sen fins de lucro para realizar investimentos culturais.
- FO223: Programa de subvencións a entidades sen fins de lucro para o apoio ao desenvolvemento de festivais audiovisuais, musicais, escénicos e mixtos na provincia da Coruña.

### **5.2 Exclusións:**

- Eventos de carácter económico vinculados á recreación histórica (feiras históricas, mercados medievais e similares) ou á celebración gastronómica (festas, xornadas de degustación de produtos e similares).
- Actividades de carácter non estritamente cultural, como viaxes de ocio (excursións, viaxes turísticos e similares) ou festas e celebracións de carácter veciñal (festas parroquiais, veciñais, gastronómicas, patronais...).
- Actividades formativas non vinculadas directamente a contidos artísticos (mecnografía, informática, manualidades, labor de retallos, cociña...).
- Actividades deportivas, de promoción económica, de servizos sociais e de turismo.
- Actuacións artísticas adxudicadas dentro da Rede Cultural.
- Festivais de carácter profesional cun orzamento igual ou superior a 10.000 € (que teñen o programa específico FO223)

## **Base 6. Forma e prazo da solicitude**

### **6.1 Forma**

Non se admitirá máis dunha solicitude por persoa ou entidade. Co fin de que non se eluda o cumprimento deste límite, considerarase que existe só una persoa xurídica privada cando as persoas socias ou directivas sexan comúns en máis dun 50 por cento en dúas ou máis entidades nos termos establecidos na Lei xeral de subvencións e nas súas normas de desenvolvemento, así como as que puideren encaixar no concepto de grupo nos termos dispostos no Código de Comercio.

A forma de presentación da solicitude será a que se indica na Ordenanza xeral de subvencións e transferencias da Deputación Provincial da Coruña.

O prazo de presentación de solicitudes determinarase na convocatoria, que se publicará no BOP, por conduto da Base de Datos Nacional de Subvencións..

Os datos persoais facilitados serán tratados pola Deputación da Coruña, como responsable do tratamento, co fin de levar a cabo a tramitación administrativa dos programas de subvención. As persoas interesadas poden exercer os dereitos de acceso, rectificación, supresión, oposición, limitación ao tratamento e portabilidade dos datos a través da sede electrónica da Deputación da Coruña ou presencialmente nos lugares e rexistros establecidos na normativa reguladora do procedemento administrativo común. Máis información na [Política de Privacidade](#) da Deputación.

## **Base 7. Compromisos e obrigas**

Ademais dos requisitos dispostos con carácter xeral na lexislación básica estatal e autonómica e na Ordenanza xeral de subvencións e transferencias da Deputación, as persoas beneficiarias, deberán cumprir cos seguintes compromisos e obrigas:

### **7.1 Recollida de datos desagregados**

Recabar datos desagregados por sexo no caso de realizar estudos, estatísticas, enquisas e formularios.

### **7.2 Remisión de copia dos libros ou discos subvencionados**

No caso de que o obxecto da subvención sexa a realización dun libro ou disco, deberán enviar unha copia destes a través do rexistro xeral da Deputación provincial da Coruña con carácter previo á presentación da xustificación.

### **7.3 Difusión do apoio da Deputación**

As entidades beneficiarias incluírán en lugar visible o [logotipo da Deputación](#) na súa páxina

web e nos soportes de difusión das actividades subvencionadas.

As obrigas de difusión do apoio da Deputación entenderanse desde a data de concesión ata o pago da subvención.

#### **7.4 Lingua galega**

As entidades beneficiarias deberán ter sempre a súa **páxina web oficial en lingua galega** e o conxunto de soportes informativos e de difusión das súas actividades (folletos, carteis, cuñas de audio, programas de man, etc.) deberán de estar sempre en lingua galega, sen que iso exclúa a posibilidade de utilizaren tamén outras linguas.

Non se subvencionarán actividades, materiais nin contidos que exclúan a lingua galega. Por tanto, todas as actividades e materiais subvencionados deberán realizarse en lingua galega, sen prexuízo de que tamén poidan incluír outras linguas.

### **Base 8. Valoración das solicitudes e procedemento de concesión**

#### **8.1 Procedemento de concesión**

A concesión das subvencións realizarase en réxime de concorrencia competitiva polo procedemento de concesión provisional e concesión definitiva regulado na Ordenanza xeral de subvencións e transferencias e será aprobada por resolución da presidencia.

A cantidade que se concederá dependerá da suma agregada dos diferentes criterios e as súas respectivas ponderacións, tendo en conta os límites máximos e mínimos cuantitativos e porcentuais establecidos, así como o redondeo ao céntimo das cantidades resultantes.

#### **8.2 Valoración das solicitudes**

Para a valoración das solicitudes nomearase unha comisión técnica que estará composta por tres persoas expertas e de recoñecida traxectoria no ámbito cultural obxecto desta convocatoria, que non teñan relación con ningunha das entidades solicitantes nin relación directa cos proxectos que se poidan presentar:

A designación dos membros da comisión técnica realizarase por Resolución de Presidencia, e será pública, a través da súa publicación no Boletín Oficial da Provincia.

A entidade deberá completar todos os apartados da memoria, para posibilitar a adecuada valoración das solicitudes. Non se terán en conta para o baremo -nin se fará requirimento deles- aqueles aspectos da memoria non acreditados ou non informados debidamente pola entidade solicitante.

No caso de contradición entre a memoria e os datos completados na solicitude prevalecerán os datos contidos na memoria.

### **8.2.a VALORACIÓN DIRECTA DE DATOS: ata 30 puntos**

- **Coeficiente de financiamento derivado da solicitude**, ata 10 puntos.
  - Entre 60% e 70%, 2 puntos
  - Entre 50% e 59,99%, 4 puntos
  - Entre 40% e 49,99%, 6 puntos
  - Entre 30% e 39,99%, 8 puntos
  - Entre 20% e 29,99%, 10 puntos.
  
- **Recursos e estrutura da entidade**, ata 5 puntos
  - A entidade ten persoal propio contratado durante todo o ano, máximo de 2 puntos: 1 punto por persoa contratada
  - A entidade conta cun local social en alugueiro, propiedade ou cesión de uso por un mínimo de 10 anos desde a data de presentación da solicitude acreditada documentalmente, 2 puntos. Non se valorarán as cesións en precario de uso do local social
  - A entidade puxo o seu local a disposición doutras entidades sen ánimo de lucro, de forma gratuíta, un mínimo de 20 días durante o ano anterior á convocatoria, 1 puntos.
  
- **Soportes de difusión**, ata 10 puntos
  - A entidade conta con perfís propios en redes sociais, actualizados e en lingua galega: un punto por rede social, ata un máximo de 5 puntos
  - A entidade conta con páxina web propia, actualizada e en lingua galega, 2 puntos
  - A entidade usa, para a súa páxina web, o dominio (.gal) como dominio principal, 1 punto
  - A entidade realiza algunha publicación periódica, accesible para calquera persoa interesada nela, (só se puntuarán revistas, libros, anuarios, investigacións...e non se terán en conta elementos divulgativos puntuais, como cartaces, follas voandeiras ou folletos), 2 puntos
  
- **Colaboración socio-cultural e impacto no territorio**, ata 5 puntos
  - A entidade colabora con algunha outra asociación sen fins de lucro no desenvolvemento dalgunha das actividades ou proxectos culturais para os que solicita a subvención (Non contabilizarán neste apartado, nin concellos nin centros de ensino), 1 punto por asociación, sen contar a solicitante, ata un máximo de 5 puntos

Para a valoración deste apartado será precisa a presentación de cartas de colaboración asinadas polas entidades colaboradoras na que se explique o contido desta.

**8.2.b VALORACIÓN DA COMISIÓN TÉCNICA, ata 70 puntos, a través de informe da Comisión de Valoración Técnica, en que se teñen en conta os seguintes aspectos:**

- **Traxectoria da entidade solicitante, ata 20 puntos**

Valorarase a relevancia da traxectoria e das liñas de traballo da entidade, a partir da información que esta ofrezca sobre o ano de fundación, os anos de funcionamento, o número de persoas asociadas, as liñas de actividade que tivo no pasado e ten na actualidade, os principais proxectos que levou a cabo e todos aqueles aspectos que axuden a ponderar a importancia do traballo sociocultural da entidade para o seu entorno.

- **Interese do proxecto para o que se solicita subvención, ata 40 puntos**

Para todas as modalidades: A efectos da valoración, a entidade desenvolverá unha explicación das actividades que vai realizar e para as que solicita apoio, detallando a súa natureza, singularidade, interese social e cultural, o seu calendario temporal, os obxectivos, as persoas ou colectivos destinatarios, os elementos innovadores e toda aquela información que permita ter un coñecemento axeitado do proxecto que se pretende desenvolver.

No caso da modalidade B, terase en conta, se as actividades para as que solicita a subvención repercuten positivamente nalgúns dos seguintes campos: o fortalecemento dos vínculos comunitarios e a cohesión e integración social, a recuperación da identidade e a memoria local, a promoción das relacións interxeracionais, a participación e opinión da veciñanza, a posta en valor de elementos patrimoniais e históricos da localidade.

No caso da modalidade C, terase en conta o impacto e relevancia das actividades para as que se solicita subvención no campo específico de actuación da entidade solicitante.

- **Enfoque social do proxecto, ata 10 puntos**

Para a súa valoración, a entidade desenvolverá unha explicación sobre como o proxecto repercute en aspectos relevantes para a vida cotiá da sociedade e do entorno, como os seguintes:

- **sostibilidade medioambiental**
- **igualdade de xénero**
- **defensa da lingua e da cultura galega**
- **defensa da dignidade, da liberdade e dos dereitos das persoas e os grupos que conforman, con especial atención ás:**
  - **persoas con discapacidade, con dependencia, persoas maiores, familia, infancia e adolescencia**
  - **persoas en situación de risco e/ou en exclusión social**

### **8.3 Causas de exclusión**

Quedarán excluídas as solicitudes que non acaden un mínimo de 40 puntos no conxunto da valoración, dos que 20 deberán corresponder aos apartados valorados pola comisión

técnica.

Esta comisión poderá propoñer a exclusión directa de solicitudes, de forma argumentada e por unanimidade, caso de identificar unha inadecuación da solicitude presentada á finalidade e obxecto desta convocatoria. Do mesmo xeito, poderá facelo se identifica contidos de carácter discriminatorio ou vexatorio contra persoas ou colectivos.

#### **Base 9. Xustificación e pago**

Será de aplicación a conta xustificativa simplificada nos termos do artigo 75 do Real decreto 887/2006, do 21 de xullo, polo que se aproba o Regulamento da Lei 38/2003, do 17 de novembro, xeral de subvencións

A xustificación poderá presentarse a partir do día seguinte á publicación da resolución de concesión definitiva das subvencións no BOP. O prazo para a xustificación das subvencións rematará o día **31 de marzo de 2027**, ás 14:00 horas.

#### **Base 10.- Incumprimentos e sancións**

Será de aplicación o disposto na Ordenanza Xeral de Subvencións e Transferencias.

### **ANEXOS DOCUMENTACIÓN**

#### **ANEXO I - Documentación da solicitude**

##### **Declaracións:**

- A entidade que represento cumpre todos os requisitos esixidos aos solicitantes na lexislación vixente en materia de subvencións, nas bases reguladoras da presente convocatoria e na ordenanza xeral de subvencións e transferencias da Deputación Provincial da Coruña, e no caso de resultar beneficiaria da subvención comprométese a cumprir fielmente todas as obrigas e compromisos recollidos nas mesmas e a acreditar de forma fehaciente o seu cumprimento, no caso de ser requirida pola Deputación.
- A entidade que represento comprométese a utilizar a lingua galega no desenvolvemento do proxecto subvencionado e na produción escrita e oral (cartelaría, publicidade oral e escrita, redes sociais, etc.) a que dea lugar toda a actividade subvencionada, e a dar cumprimento á aquelas outras obrigas establecidas nas bases específicas en relación coa lingua galega.
- A entidade que represento comprométese a empregar unha linguaxe non sexista e inclusiva; tratar as imaxes con valores de igualdade, presenza equilibrada, diversidade, pluralidade de roles e identidades de xénero e a recabar datos de

participación desagregados por sexo no caso de estudos, estatísticas, enquisas e formularios.

- A entidade que represento comprométese a dar cumprimento as obrigas de difusión do apoio da Deputación establecidas nas bases específicas.
- No caso de que algunha das actividades implique contacto habitual con menores, a entidade que represento comprométese a comprobar que o persoal ao seu cargo non foi condenado por sentenza firme por ningún delito contra a liberdade sexual.
- A entidade que represento está legalmente constituída antes da presentación da solicitude e dispón dos estatutos adaptados á lei vixente. Asemade, o seu obxecto a faculta para a participación nesta convocatoria.
- Declaro que nin eu nin a entidade á que represento estamos incurso/as en ningunha das prohibicións previstas no art. 10 da Lei 9/2007 de Subvencións de Galicia, do 13 de xuño para ser beneficiarias ou percibir subvencións da administración pública.
- A entidade que represento comprométese a solicitar tres orzamentos de distintos provedores, no caso de que contrate cun mesmo provedor un gasto superior a 15.000 € (IVE excluído) pola prestación dun servizo, e de que seleccionará un deles de xeito motivado, nos termos do artigo 31.3 da Lei 38/2003, do 17 de novembro, xeral de subvencións

#### **Documentación:**

- Certificación do acordo de solicitude, de representación, delegación, cargos da entidade e, no seu caso, número de persoas asociadas.
- Memoria da solicitude.
- Estatutos da entidade adaptados á lexislación vixente nos que conste a inscrición no rexistro público correspondente.
- No caso de que a entidade solicitante concerte a execución total ou parcial da actividade ou proxecto subvencionado con persoas físicas ou xurídicas vinculadas á entidade: Solicitude de autorización segundo o disposto no artigo 29.7.d, da Lei xeral de subvencións e artigo 68 do Regulamento desta lei aprobado por RD 887/2006, do 21 de xullo.
- No caso de declarar que a entidade é propietaria, ten en alugueiro ou ten cedido o local social, deberá achegarse acreditación da propiedade, do contrato de alugueiro ou do acordo de cesión, cunha duración mínima de 10 anos desde a data de presentación da solicitude.
- No caso de declarar que ten persoal propio contratado, última nómina mensual de cada persoa traballadora.
- Cartas de colaboración asinadas pola entidade colaboradora, no caso de ser necesario para a valoración

- Certificacións das administracións tributarias correspondentes e da Tesourería da Seguridade Social nas que se acredite que a entidade está ao corrente nas súas obrigas tributarias e coa Seguridade Social. Poderá omitirse a presentación desta documentación sempre que autorice expresamente na Plataforma SUBTEL a consultas tributarias e non se opoña á consulta de datos da Seguridade Social.

**A entidade deberá presentar a documentación esixida segundo os modelos que figuran na plataforma SUBTEL.**

## **ANEXO II - Documentación xustificación**

### **Declaracións:**

- A entidade que represento deu cumprimento ás obrigas de difusión do apoio da Deputación establecidas nas bases específicas.
- No caso de que algunha das actividades realizadas implicara contacto habitual con menores, a entidade que represento comprobou que o persoal ao seu cargo non foi condenado por sentenza firme por ningún delito contra a liberdade sexual.
- A entidade que represento non ten pendente de xustificación ningunha cantidade anticipada pola Deputación na que xa rematara o prazo para a presentación de xustificantes.
- No caso de que o obxecto da subvención sexa a realización dun libro ou disco, declaro que a entidade que represento enviou á Deputación unha copia deste.
- No caso en que os gastos subvencionables non acaden o importe mínimo a xustificar, ou se aplique algunha das reducións contempladas nas bases ou no caso en que a achega provincial, xunto cos outros ingresos percibidos para o mesmo obxecto, supere aos gastos executados: A entidade que represento renuncia á parte da achega provincial non xustificada e, no seu caso, acepta o reintegro da cantidade anticipada.
- No caso en que a xustificación se presente fóra de prazo: A entidade que represento acepta a sanción que corresponde e consinte en efectuar voluntariamente o pagamento desta mediante compensación no pago da subvención, e non presentará alegacións nin recurso algún ao respecto (Esta declaración suporá unha REDUCCIÓN DO IMPORTE DA SANCIÓN DUN 90%).

### **Documentación:**

- Acreditación da representación, delegación e cargos da entidade, no seu caso.
- Memoria xustificativa.
- Relación clasificada dos gastos realizados: Documento descargable en SUBTEL e



que se xera automaticamente unha vez rexistrados os gastos da actividade ou investimento obxecto de subvención no apartado correspondente da xustificación.

No suposto de que se xustifiquen gastos de persoal, no detalle de gastos indicárase, para cada traballador/a e mes, o importe bruto da nómina (conta 640) e o importe da seguridade social con cargo á entidade (conta 642) que corresponda en función do tempo destinado ao proxecto subvencionado.

- Relación detallada dos ingresos de natureza pública ou privada obtidos para a mesma finalidade, con indicación do seu importe e procedencia, así coma dos propios ingresos que xere a actividade subvencionada ou, pola contra, manifestación de que non se obtiveron outros ingresos para a mesma finalidade
- Declaración da entidade indicando se está ou non exenta do IVE e se está suxeita á regra de rateo a porcentaxe deducible, xa que só poderá terse en conta o cargo co dito imposto cando sexa soportado pola entidade e na porcentaxe que non fora deducible.
- Proba documental dos medios polos que se lle deu difusión á subvención concedida e do uso da lingua galega.
- No caso de que contratase cun mesmo provedor un gasto superior a 15.000 € (IVE excluído) pola prestación dun servizo: Copia dos tres orzamentos solicitados e motivación da contratación da empresa seleccionada no caso de que non sexa a máis económica.
- Certificacións das administracións tributarias correspondentes e da Tesourería da Seguridade Social nas que se acredite que a entidade está ao corrente nas súas obrigas tributarias e coa Seguridade Social. Poderá omitirse a presentación desta documentación sempre que autorice expresamente na Plataforma SUBTEL a consultas tributarias e non se opoña á consulta de datos da Seguridade Social

*Documentación adicional no caso de que a entidade non estea dada de alta na base de datos de terceiros da Deputación provincial da Coruña ou teña intención de designar unha nova conta bancaria:*

- Designación de conta bancaria da entidade no modelo aprobado pola Deputación da Coruña, asinado co certificado de representación da entidade.
- Certificado acreditativo da titularidade da conta, emitido e asinado electronicamente pola entidade bancaria correspondente ou asinado co certificado de representación da entidade solicitante.

**A entidade deberá presentar a documentación esixida segundo os modelos que figuran na plataforma SUBTEL.**

## **ANEXO - EXTRACTO DA CONVOCATORIA**

### **GALEGO**

#### **Primeiro. Beneficiarios**

Entidades culturais; entidades veciñais e de tempo libre; entidades sociais e asistenciais

#### **Segundo. Obxecto**

Será obxecto deste programa o apoio ao desenvolvemento de proxectos e actividades culturais na provincia da Coruña por parte de entidades sen fins de lucro.

#### **Terceiro. Bases reguladoras**

A presente convocatoria rexerase polas Bases reguladoras publicadas no BOP.

#### **Cuarto. Contía**

O importe da consignación ascende a un total de 1.200.000 €, con cargo á partida 0612/3341/481 do Orzamento ordinario para 2026. As axudas a conceder oscilarán entre un mínimo de 3.000 € e un máximo de 30.000 €.

#### **Quinto. Prazo de presentación de solicitudes**

O prazo de solicitude iniciárase ás 08:00 horas do día 15 de novembro de 2025, e finalizará ás 14:00 horas do día 16 de decembro de 2025, tendo en conta que, tanto as solicitudes coma o resto da tramitación do programa, realizarase por vía telemática a través da plataforma SUBTEL, accesible dende a sede electrónica da Deputación Provincial da Coruña.

#### **Sexto. Outros datos de interese**

Tanto as solicitudes como o resto da tramitación da presente convocatoria, realizarase por vía telemática a través da plataforma SUBTEL, accesible dende a sede electrónica da Deputación Provincial da Coruña <https://sede.dacoruna.gal/>

### **CASTELLANO**

#### **Primero. Beneficiarios**

Entidades culturales; entidades vecinales y de tiempo libre; entidades sociales y asistenciales.

#### **Segundo. Objeto**

Será objeto de este programa el apoyo al desarrollo de proyectos y actividades culturales en la provincia de A Coruña por parte de entidades sin fines de lucro.

#### **Tercero. Bases reguladoras**

La presente convocatoria se regirá por las Bases reguladoras publicadas en el BOP.

#### **Cuarto. Cuantía**

El importe de la consignación asciende a un total de 1.200.000 €, con cargo a la partida 0612/3341/481 del Presupuesto ordinario para 2026. Las ayudas a conceder oscilarán entre un mínimo de 3.000 € y un máximo de 30.000 €.

#### Quinto. Plazo de presentación de solicitudes

El plazo de solicitud se iniciará a las 08:00 horas del día 15 de noviembre de 2025, y finalizará a las 14:00 horas del día 16 de diciembre de 2025, toda vez que, tanto las solicitudes como el resto de la tramitación del programa, se realizará por vía telemática a través de la plataforma SUBTEL, accesible desde la sede electrónica de la Diputación provincial de A Coruña.

#### Sexto. Otros datos de interés

Tanto las solicitudes como el resto de la tramitación de la presente convocatoria, se realizará por vía telemática a través de la plataforma SUBTEL, accesible desde la sede electrónica de la Diputación Provincial de A Coruña <https://sede.dacoruna.gal/>